



11
1774
3



藏書紀事詩卷二

長洲葉昌熾

海上小山壓大山大山力比小山孱穹廬未可藏書卷望海

堂中誓不還

東丹王倍

遼史東丹王倍小字圖欲太祖長子也幼聰敏好學太祖破渤海大譴譏改其國曰東丹以倍爲人皇王主之建元甘露後讓位德光德光旣立見疑以東平爲南京徙倍居之置衛士陰伺動靜唐明宗聞之使人跨海持書密招倍倍立木海岸刻詩曰小山壓大山大山全無力羞見故鄉人從此投外國攜高美人載書浮海而去唐明宗賜姓東丹名慕華復賜姓李名贊華倍初市書至萬卷藏於醫巫閭絕頂之望海堂通陰陽知音律工遼漢文章嘗譯陰符



1774
卷 8

經善畫本國人物 謝啓昆詩建國東平恨徙居數峯拳
石壓穹廬大山無力乘桴去望海堂中萬卷書 志雅堂
雜鈔王介石有東丹王贊華所畫番部行程圖道君題云
世所謂東丹王者也所畫絕妙與王子慶西域圖相伯仲
昌熾案元耶律楚材東丹王之八世孫箸湛然居士集
其子鑄箸雙谿醉隱集漠北世家專精文學鮮有能過之
者未始非醫巫閻萬卷爲之貽謀也王爲五季時人但遼
史有傳斷代仍宜從遼次於宋後

空山夜抱策書哭墜履遺簪感慨皆莫笑平泉李丞相一花
一石亦關懷 元好問裕之

郝經遺山先生墓銘先生以金源氏有天下典章法度幾

及漢唐國史實錄在順天道萬戶張公府願爲撰述乃爲
中州集百餘卷又爲金源君臣言行錄往來四方采摭遺
逸有所得輒以寸紙細字親爲紀錄至百餘萬言捆束委
積塞屋數楹名之曰野史亭先生諱好問字裕之太原定
襄人登興定五年進士天興初入翰林知制誥金亡不仕
而卒 劉靜修詩百年圖籍有蕭相一代英雄誰蔡公策
書紛紛少顏色空山夜哭遺山翁自注汴亾張蔡公以金
實錄歸遺山嘗就公謄錄 遺山故物譜子家所藏書宋
元祐以前物也貞祐丙子之兵藏書壁閒得存兵退子將
奉先夫人南渡河舉而付之太原親舊家自餘雜書及先
人手寫春秋三史莊子文選等尚千餘冊并畫百軸載二

鹿車自隨是歲寓居三鄉其十月北兵破潼關避於女几之三潭比下山則焚蕩之餘蓋無幾矣往在鄉里常侍諸父及兩兄燕談每及家所有書則必枚舉而問之如曰某書買於某處所傳之何人藏之者幾何年則欣然志之今雖散亾其綴緝裝褙籤題印識猶夢寐見之或曰物之閱人多矣世之人玩於物而反爲物所玩貪多務取巧偷豪奪遺簪敗履惻然興懷者皆是也李文饒志平泉草木有後世毀一樹一石非吾子孫之語歐陽公至以庸愚處之子以爲不然三代鼎鐘其初出於聖人之制不曰永用享則曰子子孫孫永寶用豈聖人超然遠覽而不能忘情於一物耶蓋自莊周列禦寇之說盛誕者遂以天地爲逆旅

形骸爲外物雖聖哲之能事有不滿一笑者况外物之外者乎丙申八月二十有二日洛州元氏太原房某引

開卷鬚眉一笑同道人舊住水晶宮寶書轉展歸天上空自傷心到牧翁

趙文敏孟頫

明李維柱本石

式古堂書畫攷元趙孟頫字子昂號松雪又號鷗波水晶宮道人宋司戶參軍入元官至翰林學士承旨贈魏國公諡文敏 七頌堂識小錄宋版書所見多矣然未有踰前漢書者於中州見一本出王元美家前有趙文敏小像陸師道亦寫元美小像於次帙標籤文衡山八分書 天祿琳琅漢書宋刻本王世貞跋云余平生所購宋本班范二書尤爲諸本之冠桑皮紙白潔如玉四旁寬廣字大者如

藏書一
三
錢有歐柳筆法細書絲髮膚緻墨色精純前有趙吳興小
像 又錢謙益跋趙文敏家藏前後漢書太倉王司寇得
之吳中陸太宰家余以千金從徽人贖出藏弄二十餘年
今年鬻之四明謝象三牀頭黃金盡生平第一殺風景事
也此書去我之日殊難爲懷李後主去國聽教坊雜曲揮
淚別宮娥一段淒涼景色約略相似又云吾家藏書盡爲
六丁下取此書卻在人閒武林坦公司馬攜以見示嗚呼
佛言昔年奇物經歷年歲忽然復覩記憶宛然皆是藏識
變現良非虛語又云景山李維柱字本石本寧先生之弟
也嘗語余若得趙文敏家漢書每日焚香禮拜死則當以
殉葬余深愧其言昌熾案文敏漢書今歸 天府以上諸

跋藏弄源流釐然可攷故詳錄之 又元本大廣益會玉
篇趙孟頫藏本有水晶宮道人印孟頫以湖州四面皆水
自號水晶宮道人解縉春雨集云文敏早年喜畫梅印以
水晶宮圖書浙中有瑪瑙寺或戲以爲對遂不用 張應
實清祕藏論書畫印識云趙字方圓二印大雅印天水趙
氏印竝趙孟頫 陳繼儒讀書十六觀趙子昂書跋云聚
書藏書良非易事善觀書者澄神端慮淨几焚香勿捲腦
勿折角勿以爪侵字勿以唾揭幅勿以作枕勿以夾刺隨
損隨修隨開隨掩後之得吾書者并奉贈此法 暴書雜
記汲古影寫許棊梅屋詩稿第四卷後有朱文方印云趙
文敏書卷末云吾家業儒辛勤置書以遺子孫其志何如

藏書一
四

後人不讀將至於鬻頽其家聲不如禽犢若歸他姓當念斯言取非其有无甯舍旃凡五十六字

博進新償十萬緡隋珠爲燭蠟爲薪祝融餘燼空收拾故紙原難換告身

莊肅恭叔

松江府志莊肅字恭叔號蓼塘居青龍鎮仕宋爲祕書小史宋亡棄官浪迹海上性嗜書聚至八萬卷手抄經史子集下至稗官小說靡所不具書目以甲乙分十門至正間修宋遼金史詔求遺書危素購於其家得五百卷輟耕錄蓼塘既沒子孫不知愛惜或爲蟲鼠蝕齧或爲鄰識盜竊或供飲博之需或應餽覆之用編帙散亂所存無幾至正六年詔求遺書有以書獻者予一官江南藏書多者止

三家莊其一也繼命危學士素特來選取其家恐兵遁圖讖干禁悉付祝融其孫羣玉收拾燼餘覲領恩澤宿留日久仍布衣而歸書之不幸如此五茸志逸元文宗時經筵語及唐聶夷中詩詢其有文集否諸學士以未聞對或言莊氏富藏書特旨訪其家果有聶集上之敕授教授楊瑀山居新語上海縣士人莊蓼塘者藏書至七萬卷其子欲售之買者積年無有好事者可見其鮮

荒江寒雪釣潛蛟一葉煙波不繫匏載得筆牀茶竈去篝燈怪牒寫元包

袁易通甫

黃潛靜春先生墓志銘君諱易字通甫曾大父璉築室長洲之蛟龍浦君不樂仕進所居西偏爲堂曰靜春左江右

湖禽魚飛泳於煙波莽蒼閒堂中有書萬卷悉君所校定
客至輒斂卷與縱飲劇談留連竟日 楊載靜春堂詩集
序通甫有宅在郡城東南二十里蛟澤之濱蛟澤當吳淞
江之下其水甚深 陸文圭跋袁靜春詩具區甫里之閒
近世有隱君子焉結茅構亭出蒼莽之墟樵村漁舍混爲
一區城市之跡疏而麋鹿之性馴嗜欲之機淺而鷗鳥之
情親所交皆畸人逸士西鄰北里詩筒往來清江白月舉
樽相屬優游不仕者四十餘年 四庫提要靜春堂集四
卷元袁易撰易居吳淞具區之閒築堂曰靜春聚書萬卷
或掉舟載筆牀茶竈古器游於江湖趙孟頫嘗爲畫臥雪
圖稱易與龔璠郭麟孫爲吳中三君子

祠祿難言領洞霄一枝避迹等鷓鴣欲知梅礪藏書窖用上
清容學士橋袁文清橋

四庫提要延祐四明志十七卷元袁桷撰桷字伯長慶元
人宋知樞密院事韶之曾孫少爲麗澤書院山長以薦改
翰林國史院檢閱官累遷侍講學士卒贈江浙行省參知
政事謚文清所著易說春秋說世久無傳惟清容居士集
及此志尙存 至正直記袁伯長學士承祖父之業廣蓄
書卷國朝以來甲於浙東伯長沒後子孫不肖盡爲僕幹
竊去轉買他人或爲婢妾所毀者過半 全祖望湖語淵
然清容丕振剝源遺老之幟而牙籤之於王氏亦復竝峙
彼津逮者蓋未易以猝詣自注南湖藏書前王後袁 又

胡梅礪藏書窖記南湖學士橋清容之故居也其東軒有石窖焉予過而歎曰此梅礪藏書之所也宋亾遺老避地來慶元者多先生館袁氏注通鑑成編而已丑寇作以書藏窖中得免

家世何嫌賣布翁圖書研北自玲瓏豹胎熊掌兼珍味豈獨

蝼蝸薦水蟲

吳郡陸君

陸友友仁

黃潛陸氏藏書目錄序吳郡陸君居闔閭中四壁之外輒與賈區直君殊不以爲溷一榻蕭然環以古今書凡若干卷自經史傳記下至權謀數術泚勝虞初旁行敷落百家眾技之文櫛比而鱗次入其室如登羣玉之府而探蓬萊道家之名山忘其爲居之隘也君旣第其篇帙部分類別

爲之目錄以便覽者且屬予使序之夫稻梁稷黍魚肉果蔬人所資以爲生養之具不可一日缺者也得之足以飽而不足以極天下之味言珍異之味至豹胎腥膻封熊之蹠可以爲美也而非可常致以給朝夕之須彼水草小蟲蝸范蝼蝸野果之實人所易致而未必皆知好其味也世蓋有嗜書若嗜飲食者顧所嗜之不同而有不可得兼耳君其兼而取之者耶老子曰五味令人口爽好奇之士苟游於君而獲其所嗜焉染指而出足矣尙無以秦人之炙易吾之炙也哉 古夫于亭雜錄大名門人成文昭字周卜寄陸務觀南唐書宋槧本也凡十五卷與今刻十八卷編次小異前有陸友私印陸友仁印燕處超然印 昌熾

案陸友卽撰墨史及研北雜志者 四庫提要稱友字友仁亦字宅之平江人徐顯稗傳載友仁生市廛闖閭閻父以市布爲業獨能異其所好攻苦於學博極羣物自號研北生箸研史墨史印史杞菊軒彙所言與黃文獻記悉合則陸君之爲友仁無可疑者仍兩列之以示闕疑

愛書癖亦等憐才擁篲分庭事郭隗未有千金求駿骨望諸何日自齊來 景春沈君

陌宋樓藏書志嘯堂集古錄干文傳跋景春沈君居樂圃坊與余同游可邨賀先生之門平生寡嗜欲惟酷好收書有別業在閩門西去城僅數里景春昔嘗居之人有挾書求售至必勞來之飲食之酬之善價於是奇書多歸沈氏

集古錄其一也昔人有以千金市馬者得駿骨子五百金逾年而千里馬至者三景春嗜書何以異哉元統後元十

一月

嗚咽江頭變徵聲銅山傾處洛鐘鳴趙家已是無完土樓上

遺民擁白城 張雯子昭

鄭元祐張子昭墓志張雯字子昭其先浚儀人祖父世居吳雯少嗜學時宋社已屋三十稔矣故老遺黎猶有存者子昭從其人問宋遺事得其什一喜游錢塘山川城邑徘徊躑躅感歎不能已兼通聲律家臨市衢構樓蓄書自經傳子史下逮稗官百家無不備日繙閱研究年六十四卒於至正十六年十一月子由次子里孫男一名肯 杭州

府志雲南渡居錢塘精律呂每眾坐聞樂輒俯首頌蹙曰
吾其不免乎子田字耘已亦工文詞田子肯字繼孟一字
寄夢從宋濂學昌熾案蘇州府志雲亦有傳藝文類書畫
記補遺繼潛錄墨記皆雲撰觀鄭元祐所撰志雲實吳人
特嘗寓於錢塘耳 又案天祿琳瑯說文解字有子昭印
據嘉興府志以爲盛懋字子昭非是亦雲所藏也 鐵琴

銅劍樓書目簡齋外集卷首有張子昭印朱記

若得滋溪蘇氏本論思不但證松廳先求宋本書堂記再讀

清容藏室銘

蘇天爵伯修

四庫提要元朝名臣事略十五卷蘇天爵撰天爵字伯修
真定人由國子學生試第一釋褐授從仕郎蘇州判官終

浙江行省參知政事 又元文類七十卷目三卷蘇天爵
編天爵所著尚有松廳章奏春風亭筆記諸書於當代掌
故最爲嫻習 宋本滋溪書堂記蘇伯修家多藏書習知
遼與金故實且謂予昔吾高王父玉城當國初自汴還眞
定置別墅縣之新市作屋三楹買書數千卷歲久堂壞先
人葺之且漸市書益之又嘗因公事至江之南獲書萬卷
以歸 袁桷蘇氏藏書室銘趙郡蘇氏崇其書楹剖史雲
章經緯有程靈根湛虛服習粹精

讀書種子魯東家油幕深嚴護碧紗紙補鞋幫糊醬瓿可憐

片片女郎花

孔文昇退之

孔齊行素

開有益齋讀書志至正直記四卷元闕里孔克齊撰克齊

字行素一字靜齋至聖五十五世孫祖宗善爲建康路教
授父文昇字退之爲建康書椽因家岳山克齊贅於沈氏
憲司薦授黃岡書院山長召爲國史編修 至正直記吾
家自先人寓溧陽分沈氏居之半以爲別業多蓄書卷平
昔愛護尤謹雖子孫未嘗輕易檢閱必告於先人得所請
乃可置於外館晚年子弟分職任於他所惟婢輩幾人在
侍予一日自外家歸省見一婢執選詩演半卷又國初名
公東牘數幅皆剪裁之餘者急叩其故但云某婢已將幾
卷藉鞋幫某婢已將幾卷覆醬甌予奔告先人先人曰吾
老矣不暇及此爾等居外幼者又不曉事婢妮無知宜有
此哉不覺歎恨亦無如之何矣 又先公嘗以十六字作

座右銘云甯人負我毋我負人甯存書種無苟富貴

祇陀山下雲林閣奇石碧梧交映窗脫屣田園人莫笑圖書

盡上九峰巒 倪瓚元鎮

明史倪瓚字元鎮無錫人家雄於貲工詩善書畫所居有
閣曰清閟幽迥絕塵藏書數千卷手自勘定古鼎法書名
琴奇畫陳列左右自號雲林居士 無錫縣志清閟閣在
縣東南梅里鄉之祇陀里列碧梧奇石非楊維禎張雨
諸人不得至焉 列朝詩傳瓚見俗士避去如恐浼至正
天下無事忽盡賣家產推與知舊人皆竊笑及兵興富家
盡被掠元鎮扁舟箬笠往來淮泖閒人始服前識也 馬
位秋窗隨筆余家所藏雲林自畫清閟閣題云家在梁谿

寢底之里以泥水自閉柴門掩於白日藜牀穿而未起傳癖書淫聊以卒歲 式古堂書畫攷瓚號荆蠻民又號淨名居士朱陽館主蕭閒仙卿雲林子曲全變幻霞子如幻居士滄浪漫士奚玄朗玄映又號倪迂初名珽 又李伯時三清圖有蕭閒圖書蕭閒畫印朱記 王世貞跋元人名跡雲林又自稱嬾瓚

道人在家偏好事殺青日日為書魔有時縹渺鷗波裏自倚洞簫和權歌 孫道明明叔 夏庭芝伯和

松江府志孫道明字明叔華亭人居泗涇博學好古藏書萬卷遇祕本輒手自鈔錄築映雪齋延接四方名士校閱藏書為樂又造一舟曰水光山色徜徉南浦自號停雲子

嘗與陶宗儀共汎宗儀製詞道明即倚洞簫吹之與權歌相答極鷗波縹渺之思 鄭元祐孫高士像贊引雲閒孫高士明叔隱於其里九峰三泖之間讀書績學築草堂三閒優息其中故雖甚貧用前人苦志篤學名其齋曰映雪手鈔書數百卷皆小楷齊截然自以為無所用於世視田野間寂若將終其身於是全真教主關真人號之曰清隱處士 四友齋叢說孫道明家於泗涇乃一市井人也在勝國時日惟以鈔書為樂其手鈔書幾千卷今尚有流傳者好事者以重價購之 汪巽東雲閒百詠映雪齋云名士頻煩折簡招讎書同坐夜迢迢水光山色秋江裏更譜新詞入洞簫 張雨題孫明叔映雪齋詩生白定知虛室

藏書一
妙殺青唯積古書多 學津討原刻封氏聞見記後有元
人跋云予素有藏書之癖凡親友見借者暇日多手鈔之
此書乃十五年前所鈔者至正丙申歲不幸遭時艱難烽
火四起燬燼之餘尙存殘書數百卷今僻居深村賴以自
適亦不負愛書之癖矣至正辛丑上元日重觀于泗北疑
夢軒雲閣夏庭芝伯和父謹誌昌熾案鄭元祐停雲軒記
松江夏頤貞自其上世已稱善人丙辰兵變室廬盡燬家
人僅完以城北之泗涇有舊田廬也徙家居之未知伯和
卽頤貞否讀書敏求記雲煙過眼錄有至正廿年夏頤鈔
本頤下疑奪貞字又按孫先生晚歲寫書題跋皆有歲月
見於諸家藏目彙而錄之以當先生之年譜可也菰里瞿

氏藏閒居錄一卷末題識云至正十八年戊戌之秋七月
旦日鈔於泗北村居之映雪齋又讀書敏求記自號錄一
卷至正壬寅華亭孫道明手鈔於泗北村居之映雪齋時
年六十有六又愛日精廬藏書志北夢瑣言二十卷後有
跋曰武林忻悅學家藏至正二十四年甲辰五月七日寫
起至二十七日輟卷華亭在家道人孫道明識於泗北村
居時年六十有八也又士禮居藏書題跋記衍極孫明叔
跋曰至正二十六年歲在丙午鈔於映雪齋時年七十歲
又韻宋樓藏書志玉峯先生腳氣集後有跋云錄於城南
寓舍時吳元年歲在丁未臘月二十八日庚午華亭孫道
明叔父年七十有一又海昌查樞亭孝廉藏南部新書有

先生跋云洪武五年歲次壬子仲夏九日乙卯在華亭集賢泗北村居且喫茶處寫畢清隱老人時年七十有六又臨漢隱居詩話一卷宋魏泰道輔撰洪武九年丙辰映雪老人寫於華亭集賢外坡草舍雨窗時年八十亦見錢氏敏求記錢又云予見道明所鈔書不下數十種皆在崦嵫景迫之年老而好學真炳燭之明也

翠竹清溪比若耶江心湧出馬駝沙築樓正在沙灘畔三字

新題泰不華

陳季模

鄭元祐藏書樓記維揚陳君季模家馬馱沙之上沙當揚子江之心而百川之水悉匯焉既久於是至其子天鳳字舜儀生有異稟自髫髻以至於冠惟理義是說惟圖籍是

耽君愛其子之嗜學也於是以其家舊藏書合新購而得之者凡五萬餘卷築樓於居之東而藏書於樓之上樓之前鑿池以瀦水其後萬竹森立都水庸田使白野泰公爲篆三大字以揭之乞予爲之記曩杜徵君原父每道陳君之賢今徵君已逝海內猶所稱尙別君之賢詎不信夫故爲記於樓壁俾讀之者當知陳氏藏書之意不爲科名發也不爲利祿設也蓋以爲反身窮理非誠有志於聖賢之學者不足與語陳氏藏書之意也

青城劍氣匣中騰卓行清才一見徵俯仰遺文三太息屋梁落月照漁罾

虞堪勝伯

虞子賢

姑蘇志虞堪字克用一字勝伯宋丞相允文諸孫後家長

洲隱居行義家藏書甚富多手自編輯雅重先世手澤聞有雍公遺文千里外必購得之 列朝詩傳克用爲雲南府學教授卒於官子鏞教授里中孫湜始去儒湜之子權家益貧斥賣先世故物以供衣食權死時勝伯遺文及所藏詞翰無慮數篋妻子以魚罾裹置屋梁久之并其罾亾矣徵文獻者爲三歎焉 倪瓚笠澤畱別勝伯詩清才卓行虞徵士食粥三年致母喪詩法道園能繼武畫傳洪谷早升堂 顧宋樓藏書志何水部集三卷文嘉跋云後有虞茂題一詩而用虞戡之印戡字勝伯茂或其別名也 又鼓柁藁一卷元虞戡叔勝撰昌熾案勝伯一字叔勝倪雲林有次韻叔勝先生詩亦號青城山樵楊廉夫鄧羽詩

序云至正庚寅予游錢塘過四壁山中與青城山樵遇出示古劔其先公雍國所遺卽指戡也又邾經次韻克用詩單子來歸自笠澤爲說虞君猶遁栖青城從子識丹鳳西郊草堂懷碧雞 蘇州府志虞子賢世居支塘家藏書史及古今法書名畫甲於三吳後又得朱子城南雜詠真蹟購堂序之顏曰城南佳趣

偶來山廡餌蒼朮時啾爛流酌用匏我到松雲堂上坐圖書散盡水環坳 徐達左良夫

蘇州府志徐達左字良夫受易於鄱陽邵弘道又受書於天台董仁仲隱居光福山中洪武初鄉人施仁守建甯請爲其學訓導卒於學官 倪雲林集外詩七日訪徐良輔

十三日至七寶泉上及暮舟還耕雲軒桂樹窗閒臥看雲
風吹花落紫綸巾偶來山廨餌蒼朮又向江波采白蘋
又八月七日偕耕雲窠訪耕漁隱者畱三日有圖書筆硯
之樂雲臥雨聲集庭樹颯以秋身同孤飛鶴心若不繫舟
燕俎登松菌匏尊斟澗流 吳寬題東坡遺張平陽詩真
蹟舊藏光福徐良夫家良夫所藏高編大冊甚富今不存
矣 百宋一廬賦觀溫國於徐廬箴傳家之膏盲注司馬
公文集八十卷每半葉十二行每行廿字有朱書一行云
洪武丁巳秋八月收鈐以小方章一文云徐達左印又大
方章一文云松雲道人徐良夫藏書 式古堂書畫攷朱
澤民秀野軒圖良夫題有松雲生耕漁軒良輔三印 昌

熾案耕漁軒在光福鎮同治中先師馮景亭先生卽舊址
重建其地直虎山橋三面臨水湖光山色皆在襟袖閒昌
熾每登其堂徘徊不忍去

一線驚濤逼麗譙西亭萬卷歎漂搖經衣史服何從見櫟下

生歌沐上謠 周定王楮 朱睦㮮灌甫

明史諸王傳鎮國中尉睦㮮字灌甫鎮平王諸孫幼端穎
及長被服儒素覃精經學所撰有韻譜五卷學者稱爲西
亭先生 徵刻唐宋祕本書目朱睦㮮授經圖二十卷
千頃堂書目西亭中尉萬卷堂書目十六卷朱勤美編昌
熾案勤美西亭之子朱竹垞所稱孫侍郎耳伯與西亭之
子竹居交契竹居疑爲勤美字也 萬卷堂書目跋余宅

西乃游息之所建堂五楹以所儲書環列其中倣唐人法
分經史子集用各色牙籤識別經類凡十一易詩書春秋
禮樂孝經論語孟子經解小學凡六百八十部六千一百
二十卷史類凡十二正史編年雜史制書傳記職官儀注
刑法譜牒目錄地志雜志凡九百三十部一萬八千卷子
類凡十儒道釋農兵醫卜藝小說五行家凡一千二百部
六千零七十卷集類凡三楚詞別集總集凡一千五百部
一萬二千五百六十卷編爲四部人代姓名各具撰述之
下東坡子曰余垂髫時卽喜收書然無四方之緣不能多
見大梁又自金元以來屢經兵燹藏書之家甚少閒或假
之中吳兩浙東郡耀州澶淵應山諸處或寫錄或補綴蓋

亦有年所得僅此信積書之難也隆慶庚午八月中秋日
東坡居士睦樗書 明詩綜小傳灌甫周定王六世孫萬
曆初舉宗正有坡上集錢受之云灌甫年二十通五經中
年築室東坡之上取古人經解繕寫藏弄敘而傳之先是
海內藏書富者推江都葛氏章邨李氏灌甫傾貲購之起
萬卷堂諷誦其中汴亾之後漂蕩於洪流怒濤可勝歎哉
靜志居詩話世所傳萬卷堂書目不列卷數撰人非故
籍也子家藏有聚樂堂藝文志四冊俱詳列卷數撰人係
坡上鈔本 靜惕堂集有明宗室灌夫宗正爲之最往孫
北海少宰令祥符就其第鈔經注二百餘冊載歸京師崇
禎壬午賊決河隄書堂付之巨浸徒其目存耳 周亮工

汴上謠河決後民多有以書紙蔽體者詩云雲綃霧縠經衣史服又煮書云煮奇字去黑水蹒跚老蠹魚蝸蝸登土簋天祿琳琅續編春秋經傳集解明周楠賜籍有周府御書樓寶朱印

匡廬山前雲氣濃爲雲作囊密密縫氤氳宮闕白雲裏此是西陽第幾峯甯獻王權朱謀埒鬱儀

明史諸王傳甯獻王權太祖第十七子正統十三年薨明詩綜小傳錢受之云王博學好古諸書無所不窺志慕冲舉自號臞仙令人往廬山之顛囊雲以歸結小屋曰雲齋障以簾幕每日放雲一囊四壁氤氳如在巖洞凡羣書有祕本莫不刊布又朱謀埒字鬱儀甯獻王七世孫以

中尉攝石城王府事既卒豫章人士私謚貞靜先生有枳園近藁趙一清水經注釋附錄甯獻王諸孫曰石城王奠堵奠堵諸孫曰石城鎮國將軍宸澤中尉宸澤之曾孫也列朝詩集小傳鬱儀著書百有十二種皆手自繕寫未嘗假手小胥常詒書告余願盡出其藏以相飲助繕寫經歲卷帙宏多餘千令爲余邑子屬以相寄令酒人也儻其書而焚之至今念之猶有餘恨明畫錄朱統銀字伯壘號羣玉山樵石城王孫其父謀埒以箸書名世銀承家學復精於繪事千頃堂書目簿錄類甯獻王書目一卷四庫提要甯藩書目一卷不箸撰人名氏初甯獻王權以永樂中改封南昌日與文士往還所纂輯刊刻之書甚

多其目凡一百三十七種詞曲院本道家鍊度齋醮諸儀
俱附焉 張芳徵刻唐宋祕本書例中州之西亭豫章之
鬱儀兩王孫家藏與天府埒西亭所藏盡付黃流鬱儀之
書亦遭劫火

九師易是劉安授三爵詩能衛武監竊比河閒無愧色遺經

往往出山巖

晉莊王鐘鉉

靖王奇原

端王知焯

簡王

茶餘客話明代藏書周晉二府

天祿琳瑯穀梁注疏晉

藩藏本朱謀埠藩獻記晉莊王鐘鉉憲王之子高皇帝曾
孫也正統七年以榆林王進封博古喜法書嘗令世子奇
原刻寶賢堂法帖今世傳書畫多晉府章卽其人也 又
唐柳先生集晉莊王鐘鉉藏本 甘泉鄉人藁跋明晉藩

刻元文類晉藩自太祖子恭王桐始封太原當嘉靖十六
年丁酉長史馬朋作序時爲簡王新塹嗣封之二年明史
諸王表端王知焯嘉靖十二年薨無子新塹以新化王知
焯長子奉敕管府事十五年嗣封序稱志道堂先王殿下
刻文類未完我虛益堂賢王殿下仰承先王之統克紹厥
志先王當謂端王知焯也端王之祖靖王爲世子時嘗取
閣絳大觀寶晉諸帖益以所藏宋元明人墨跡爲寶賢堂
帖端王合刻文選文粹文鑑文類文衡簡王能踵成其志
馬氏身爲長史蓋親見兩賢王美行者其文以河間獻王
爲比無愧辭矣 又跋秦藩本史記嘉靖十三年秦藩鑿
抑道人序以明史諸王傳表攷之乃定王惟焯也序稱我

簡祖呻吟佔畢以力學終其身則爲簡王誠泳定王爲簡王從孫傳稱有賢行序言景慕衛武以鑒抑名軒則信乎其有賢行矣 嚴元照書宋版王荆文公詩注殘卷後乾隆乙卯予從友人借得宋刻兩冊有敬德堂圖書印子子孫孫永害用印蓋明晉藩藏書也 式古堂書畫攷趙待詔瑤島會真圖有晉國奎章道濟書府晉府書畫之印清和珍玩乾坤清氣各朱記

光澤系出自遼府高唐系出自衡府廬江系出自鄭府與徽

府書共千古

光澤王寵瀆廬江王見浦

衡王祐樞徽王

高唐王厚煥

明詩綜小傳光澤榮端王寵瀆遼惠王成鍊次子成化二十三年封何喬遠云王積書萬卷世宗賜堂名曰博文

居易錄岳珂玉楮集衡府高唐王家鈔本流傳絕少高唐王諱某號岱翁工篆隸癖嗜古書寫錄多秘本鼎革後散落市肆紙墨精好裝潢工緻康熙乙巳青州市中得劉貢父春秋權衡意林二書亦高唐府中物 天祿琳瑯史記明興宗第四子衡王允燧藏本有衡王圖書印昌熾案興宗子封衡王者名允燧非允燧也允燧靖難時改封懷恩王此衡王爲憲宗第七子衡恭王祐樞高唐王名厚煥衡恭王之從父以博雅聞俱見明史 池北偶談宋岳珂玉楮集衡王府鈔本也 拜經樓藏書題跋記圖繪寶鑑黃蕘圃跋云收藏爲廬江王猶是幾百年前故物拜經樓主人以爲裝潢極精非民間藏書吾見成化時閣本大唐開

元占經每冊俱用黃綾作簿面黃絹作籤條此可見官書
鄭重卽裝潢可辨也簡莊徵君跋云廬江王藏書甚富余
所見凡數種皆善本云昌熾案天祿琳琅續編元本貞觀
政要有宗藩清暇廬江王文房記二印明宗室世系表鄭
簡王祁鏗第十子見滿別封廬江王歷四世祐昂厚光載
禮 持靜齋書目宋刻卽君胄詩有廬江王文房印 讀
書敏求記蟋蟀經二卷予昔藏徽藩芸窗道人五綵繪畫
本爲季滄葦豪奪去 千頃堂書目簿錄類徽府書目一
卷衡府書目一卷

北宋廬山長慶集絳雲種子已無存精靈未絕青蘿本不見
中郎見虎賁 宋文憲濂

澹生堂藏書約勝國兵火之後宋文憲公讀書青蘿山中
便已聚書萬卷 百宋一廛賦廬山長慶見取六丁金華
太史獨箸精靈注長慶集北宋時鏤版所謂廬山本者庚
寅一炬種子斷絕唯此金華宋氏景濂所藏小宋板圖記
宛然古香可愛推希世珍昌熾案此書亦見讀書敏求記
今藏潘文勤師滂喜齋 天祿琳琅續編宋本春秋經傳
集解有文淵閣印金華宋氏景濂諸印又史記文選皆有
景濂印 持靜齋書目羣書事林廣記前集卷之一後集
卷之二陳元靚編宋刻本有陶九成宋景濂藏書諸印攷
明史藝文志稿補宋有陳元靚事林廣記十卷蓋卽其殘
帙陶宋二公藏書至今尙存吉光片羽固不得以尋常殘

牘視之矣

燕子飛來慟革除義門高搦擘窠書方黃菹醢樓常在未必
孱王遽忽諸 浦江鄭氏

明詩綜小傳鄭灞字仲養浦江人 靜志居詩話麟溪鄭
氏先世自滎陽徙歙再徙睦州其居麟溪自淮始淮之孫
綺乾道中賜號冲素處士是為義門第一世綺之子聞聞
之子運運之子政政之子德璋德璋之子文融文融嗣子
欽仲養蓋欽之叔子也凡歷五十三世一千六百六十餘
年逮元季明初門才益甚曰深曰濂曰源曰濤曰泳曰渙
曰淵曰湜曰濟曰洧曰溟曰沂出處不齊先後以才行著
一門羣從又有檣槌杖枋材榦彬楷模桐柎棠機柏栝木

皆為士林所重於是公卿大夫先後詩文貽贈者編為麟
溪集二十二卷洵盛事矣 紫桃軒雜綴國初浦陽義門
鄭氏藏書八萬卷家有藏書樓建文君為書擘窠大字作
扁古名賢書畫妙蹟亦不下五六百種 人海記浦江鄭
氏八萬卷燬於火

佛鑑青照古城南木葉山花其一龕指大一籤還未脫好從
異世覓桓譚 蘇叔敬

讀書敏求記古列女傳七卷續列女傳一卷晉大司馬參
軍顧愷之圖畫定為古本無疑牧翁亂後入燕得於南城
廢殿卷末一條云一本永樂二年七月二十五日蘇叔敬
買到當時采訪書籍必貼進買人氏名鄭重不苟如此內

府珍藏流落人間不勝百六髓回之感 百宋一塵賦注
殘本任淵山谷大全詩注有黏籤一條云永樂二年七月
二十五日蘇叔敬買到抱冲道人得南城廢殿本古列女
傳有此卽載於敏求記者其外未聞更見於他書也予嘗
攜就小讀書堆驗之字蹟正出一手

牧馬真能除害馬車船來往載書隨里中但祝庚桑楚未有
桐鄉朱邑祠 周文襄忱 國朝丁日昌禹生

明詩綜小傳周忱字恂如廬陵人戶部尙書改工部諡文
襄性好儲書其藏室詩云羣經旣竝蓄百氏無棄捐所至
每充棟來往勞車船 丁中丞名日昌字禹生廣東豐順
人同治間開府吾吳御吏嚴而愛民如子身後謫譽參半

實則精明慈惠文襄之後能福吾吳民者公其一也藏書
極富其爲上海道時宜稼堂郁氏宋元舊本都歸插架有
持靜齋藏書目五卷其尤精者景祐本漢書世綵堂昌黎
集及宋刊禮記要義禮記集說兩漢會要東都事略皆至
寶也中丞後改閩撫解官後芸籤縹帶載歸韓江吾友袁
寶璜黼仲曾寓其齋一飽眼福 中丞百蘭山館集有園
居雜詠云中歲嗜古籍簡編時在手佞宋復佞元第恨乏
科斗人或嗤畫龍我自壓翫狗思誤亦一適窮源須緩扣
不嫌萬卷陳但恨二豎蹂文園豈消渴昌谷輒干嘔漸覺
入膏肓何自致枯朽夜夢儒冠人自言忘年友指示痼疾
由恍若肝膽剖瓊嬛本福地俗客奚可守君非蓬島仙藝

苑漫蒐取譬如雞皮翁強擁盧家婦情意不聯屬自顧增
老醜又如灌園夫遽膺青紫綬進退失常度有若被械扭
彼蒼吝清福不在富貴後胡爲聚寶笈言之若敝帚何不
學處仲開閣任奔走送書如送窮去病猶去垢聞言意開
豁默審心沮忸思欲捐夙好又恐受誑誘去書若存病無
苗徒賸莠吾書亦有神敢一卜休咎稽首決從違神曰然
否否 莫友芝宋元本經眼錄儀禮鄭注宋淳熙本同治
甲子署蘇松太道丁禹生獲之上海肆中審定爲實事求
是齋經籍之冠

村塾何從得佩鱗百錢惟有堞雞棲平泉草木荒寒甚東里
家風尙斷齋 楊文貞士奇

徐渤筆精楊文貞士奇少孤貧十六歲出爲村落童子師
欲買史略二冊百錢不能得其母夫人畜一牝雞數歲命
以易之世有此母安得不生此子 又楊文貞文籍志序
云吾先世藏書數萬卷元季悉燬於兵吾早有志於學而
孤貧不能得書稍長事鈔錄無以爲楮筆之費則往往從
人借讀不能數得年十四五出教童蒙頗有所入以供養
不暇市書也弱冠稍遠出授徒所入頗厚始蓄書不能多
也及仕於朝有常祿又時有賜賚節縮百費日月積之一
爲收書之資歷十餘年經史子集雖不能備視吾先世所
藏千百之什一視吾少時可謂富矣夫人於其所好勞心
苦力以求得之必將謹護珍襲不至於廢壞逮後之人未

嘗知得之之難蓋有棄之如瓦礫者吾懼後之人不知守也志吾之所以得而勉其所以守蓋昔人愛一草一木猶戒子孫以勿壞矧書籍聖賢至訓之所寓乎敬之哉 又宋虞世和甫最愛黃庭堅每得佳墨精紙奇玩必歸魯直國初王羽儀之最善楊士奇楊喜收書或數月不相見相見輒贈一書皆贈遺得人者也 讀書敏求記胡方平易學啓蒙通釋二卷昔楊文貞公得此書於伯氏無何失去伯氏不樂至形諸詬詈昔人矜重書籍如此後學勿漫視之 天祿琳琅續編常建詩集明楊士奇家藏有東里草堂廬陵楊士奇印二朱記 一騎傳宣至北平叩頭伏地頌神明傳家忠孝空言耳但解

從橫效蒯生

袁忠徹靜思

明詩綜小傳袁琪字廷玉鄞人有柳莊集 靜志居詩話家本土族其父彥章仕元爲翰林國史檢閱世稱菊村先生常作布衣歌云我家頗讀書初非田舍翁道其實也 今言類編廷玉少游海上遇異人授相術論人吉凶輒驗成祖聞廷玉名洪武二十三年九月密召至北平一見伏地叩頭曰真太平天子靖難後召爲太常寺丞子忠徹序班未幾琪請老歸卒贈太常少卿忠徹能傳父術宣德中嘗侍上言天顏慘肅恐宗人有急變未七日高煦反書至官尙寶少卿致仕卒年八十有三 莫氏經眼錄皇朝士學規範四十卷宋淳熙本有尙寶少卿袁氏忠徹印及袁

氏靜思齋引顏氏家訓六十五楷字長木記 陸心源蜀
大字殘本漢書跋袁忠徹字公達一字靜思天順二年卒
年八十三性好學博涉多聞 陳敬宗符臺外集序稱忠
徹退朝之暇日與縉紳文士磨礮諷詠故其收藏亦富
式古堂書畫攷東坡書劉錫敕有忠徹南昌袁氏家藏珍
玩子孫承保袁申儒印諸朱記 又趙待制臨洛神賦有
忠徹瞻衮堂朱記 又袁伯長同日分途帖有袁氏父子
列卿忠孝世家袁氏忠徹朱記

涌出飛泉映佩刀霜寒絕徹憶麾旄百餘年後方星散畢竟

書廚鎖尚牢

葉文莊盛

元孫恭煥伯寅

七世孫國華白

明書本傳盛字與中正統十三年進士吏部左侍郎謚文

莊成化十年卒 歸有光太學生葉君墓志銘文莊生鄉
進士諱晨晨生衡州府同志諱夢淇君之考也君諱良材
字世德爲文莊公世嫡曾孫子二人長恭煥次恭烝孫男
二人儉封儉圭 乾隆蘇州府志崑山葉文莊公盛宅在
東城橋西公生平嗜書手自讎錄至數萬卷嘗欲作堂以
藏之取衛風淇澳學問自修之義名曰棊竹至公之元孫
恭煥堂乃克成王世貞爲記恭煥又於宅東作繭園其孫
工部國華拓地增葺嘗掘地得泉味甘色白因自號白泉
云恭煥曾孫 本朝刑部侍郎方藹猶居此昌熾案公煥
字伯寅嘉靖丙午舉人見府志選舉又號括蒼山人 國
朝葉奕苞字九來一號二泉亦文莊裔孫 錢大昕江兩

軒集跋文莊藏書之富甲於海內服官數十年未嘗一日輟書雖持節邊徼必携抄胥自隨每抄一書成輒用官印識於卷端其風流好事如此 鐵琴銅劍樓書目論語一卷文莊藏書張棟記云文莊沒後百十有餘年而其圖書府扁鑰未疏此帙有鎮撫燕雲關防巡撫宣府關防印靜志居詩話文莊儲藏之目爲卷止二萬餘然奇祕者多亞於冊府二百年子姓蕃衍瓜分豆剖難以復聚今披棗竹堂目商盤泗鼎要非近代物惜不可得而覩矣 東齋脞語文莊書厨銘云讀必謹鎖必牢收必審閣必高子孫子惟學敦借非其人亦不孝昌熾案此銘亦附棗竹堂書目序後愛日精廬藏書志金石錄三十卷文莊手跋署吳

郡葉仲盛仲盛疑爲其號又案王聞遠蛻庵集跋蛻庵者崑山先輩文莊葉先生別號也開卷有葉氏棗竹堂藏書圖印乃葉孝廉白泉圖記文莊又號涇東道人又號澗東老漁張棟所藏論語又云有雄于南面百城大樹軒文莊七世孫三印上兩印是否出文莊不可考余所見有楷字長方印其文曰葉文莊公家世藏則其後人所鈐也又有下學齋圖書記一印出葉九來

八十樓中校說郭但供書帕餽當途何如南部烟花木高度
妝樓四大廚 郁文博文博 老寇四

上海縣志郁文博字文博景泰五年進士湖廣副使致仕
歸居萬卷樓年七十有九丹鉛校核不去手注前志遺事

載文博家居校刊陶九成說郛一百二十卷自賦詩云白頭林下一耆儒終歲樓間校說郛目力心思俱竭盡不知有益後人無其風趣如此 書影余幼時在金陵聞舊曲中老寇四家有說郛全部以四大廚貯之近見虎林刻本纔十六套每一種爲數少者尙全鏤多者咸爲逸去甚至每一集有存不四五葉者陶氏當時卽有去取未必如是之簡此刻未出時博古之士多有就寇氏鈔錄者及此刻出不知者以爲說郛盡於此更不知求其全余常言自刻本說郛出而說郛亡矣 邵懿辰簡明目錄評本說郛明人有書帕本往往刷印此書數十種卽稱某叢書予嘗見唐宋叢書卽是也

縱有通靈畫一廚豈無竊藏豎頭須慨然請返連城璧不必分吹一一竿

沈周啟南 子雲鴻維時

無聲詩史沈貞字貞吉弟恆字恆吉長洲相城里人徵士孟淵子也恆吉子周字啟南號石田人稱石田先生精於誦肄自墳典印索以及雜家言無所不窺嘗以重直購古書一部陳之齋閣一日客至見而諦視之問書所從得先生曰客何問也客曰公幸無詫書吾書也失之久矣不意乃今見之先生曰有驗乎曰某卷某某嘗書記某事或者猶存乎先生發而視之果驗卽歸之終不言售者姓名亦不譙何售者 眉公筆記沈雲鴻字維時石田之子也好古書畫往往傾囊購之縹囊細帙爛然充室又喜積書

讎勤劇曰後人視非貨財必不易散萬一能讀則吾所
 遺厚矣先石田而卒 式古堂書畫攷石田有竹居圖卷
 周鼎題詩云頭白話今雨汗青藏古書吳瑄元玉和云有
 田皆種石無屋不藏書又徐熙梅花圖卷沈貞吉跋有陶
 庵墨雲香處朱記昌熾案陶庵為貞吉之號又號陶然道
 人又白石翁灣東草堂圖有居南江鄉深處二朱記 鐵
 琴銅劍樓書曰唐賢絕句三體詩法卷首有朱文圓印曰
 鏡及吳興有竹居蓬壺侍史飛華亭諸朱記

亭館相通旁五湖衣冠如見列仙圖自從西史薪傳敬文獻

飄零悵我吳

史鑑明古

裔孫北斗辰伯

李鑑明古

列朝詩傳史鑑字明古吳江人吳文定公表其墓云吳江

穆溪之上有隱士曰史明古於書無所不讀而尤熟於史
 家居水竹幽茂亭館相通客至陳三代秦漢器物及唐宋
 以來書畫相與鑒賞好著古衣冠曳履揮麈望之者以為
 列仙之傳也又云居西村人稱西村先生有西村集 平
 津館鑒藏書籍記元本南史有史鑑之章子孫保之西史
 村人三印 池北偶談史北斗字辰伯鑑之後徙居長洲
 博雅多藏書康熙初卒年八十餘汪茗文曰此翁死吳中
 文獻絕矣 汪琬史辰伯傳辰伯少受學於劉鳳王穉登
 為諸生不得意即棄去喜蓄書所購率皆秘本或手自繕
 錄積至數千百卷齋居蕭然惟事讎校或偶有所得輒作
 小行楷疏注其旁 昌熾案義門弟子姓氏錄有李鑑明

古亦好藏書顧澗蘋黃蕘圃屢稱之士禮居題跋記所載
博雅中吳紀聞李校書集皆其家書也兩人名字皆同殆
亦如長卿之慕蘭生乎

稚子迎門婦下機庭前七檜是耶非空山猿鶴休相訝爲戀
殘書解組歸

楊儀夢羽

龔立本常熟志楊集字浩然景泰甲戌進士安州知州子
舫成化丁酉舉人莒州知州舫子儀字夢羽嘉靖五年進
士山東副使移病家居惟以讀書著述爲事構萬卷樓聚
書其中多宋元本 蘇州府志楊副使儀宅在迎恩橋東
北有萬卷樓 松窗快筆楊夢羽初歸詞曰萬卷樓前百
花徑裏年來草色荒蕪天涯客子歸夢久模糊猿鶴驚猜

已甚故山遂千里歸途念少日煙霞色相落魄帶經鉏其
下闕云人生何自苦風波險惡歲月奔徂笑候門稚子驚
問征夫惟有下機山婦應私訝貧似當初覽囊中虎符龍
敕猶恐事虛無 士禮居題跋記珩璜新論舊藏七檜山
房鈔本經立齋相國手校者七檜山房海虞楊夢羽書齋
名也其藏書所曰萬卷樓人所共知七檜山房則罕知矣
式古堂書畫攷松雪淵明像楊夢羽題有華陰世家印
昌熾案夢羽一號五川

亨父鼎儀謝弗及廉州石谷同名家可比浚川與臨穎難言
昆陵及瑯邪

陸容文量

王時敏遜之

明詩綜小傳陸容字文量太倉州人成化丙戌進士浙江

右參政有式齋集 靜志居詩話參政與張亨父陸鼎儀
 齊名號婁東三鳳其藏書之富見聞之周洽非亨父鼎儀
 所能及也 祝允明甘泉陸氏藏書目錄序故浙江參政
 式齋陸先生文量以雅德碩學偉才高識立言於憲孝兩
 朝平生蓄書甚富既歿其子鄉貢進士安甫彙列其目并
 已所得者通繫之凡為經史子集合若干卷 千頃堂書
 目簿錄類臨頴賈氏藏書目二卷賈詠又浚川何山書目
 一卷又陸容式齋藏書目錄 明畫錄王時敏字煙客太
 倉人文肅公錫爵之孫衡之子以門蔭官璽丞工詩善楷
 隸山水 吳偉業和王太常西田雜興韵其六云蕭齋散
 帙知耽癖高座談經早解圍 又歸村躬耕記吾友王烟

客太常治西田於歸涇之上去城西十有二里 天祿琳
 琅續編內經素問有婁東掃花庵鑒賞王時敏印烟客氏
 四朱記 平津館鑒藏書籍記通典詳節有王時敏鑒賞
 書畫記印 昌熾案太倉王氏文肅郡望為太原弇州山
 人郡望為瑯邪文肅藏書有王氏賜書堂印記

吏部東廂晚年筆後來一字一琅玕縱橫深得髯蘇意鬱律
 蛟螭澗底蟠 吳文定寬 伊侃

明史本傳吳寬字原博成化八年會試廷試皆第一禮部
 尚書卒贈太子太保謚文定長子奭次子奭 蘇州府志
 藝文類吳寬叢書堂書目一卷 朱彝尊書尊前集後康
 熙辛酉冬予留吳下有持吳文定公手鈔本告售書法精

楷卷首識以私印書肆索直三十金 靜志居詩話匏庵
遺書流傳者悉公手錄以私印記之前輩風流不可及也
何焯金石錄跋崑山葉文莊公故物首尾二紙則公手
所自書余收得吳文定公寫本亦皆然乃知前賢事事必
有體原貴乎多見而識之也 翁方綱題吳沈詩草合卷
後匏庵手鈔諸卷帙自署吏部東廂書者皆晚年筆 藏
書紀要匏庵抄本用紅印格其手書者佳 昌熾案余所
見叢書堂抄本公手書者精采奕奕筆法絕似蘇長公其
藏印曰古太史氏曰延州來季子後曰雙井村人又案明
雲間錢博乙丑進士亦字原博今人得舊槧本若僅有原
博一印未可遽定爲文定物也 文定家藏集伊氏重修

族譜序伊氏自沐陽徙吳中歲久遂爲著姓其居城西之
通波坊吾猶及見其盛也家喜藏書多延接郡中儒流正
統初有曰侃字剛者擢甲科給事禁中

排闥狂呼月未闌甕頭更酌一杯殘野航又繼堯民逝散盡

珊瑚與木難 朱存禮性父 朱堯民凱

文徵明朱性甫先生墓誌銘吾蘇朱性甫存理朱堯民凱
人稱曰兩朱先生正德壬申堯民死明年性甫又死 又
云兩人皆不業仕進又不隨俗爲屢井小人之業日惟挾
冊呻吟求昔人理言遺事而識之素皆高貲悉費以資其
好不恤也 又云性甫聞人有奇書輒從以求以必得爲
志或手自繕錄動盈筐篋羣經諸史下逮稗官小說無所

不有尤精楷法手錄前輩詩文積百餘家他所纂集有經
子鈔元吳郡獻徵錄名物寓言鐵網珊瑚野航漫錄鶴岑
隨筆總數百卷 昌熾案今所傳鐵網珊瑚十六卷乃趙
清常所輯性甫書八卷名珊瑚木難 列朝詩傳性甫從
杜瓊先生游有異書手自繕錄既老不厭而坐貧無以自
資其書旋亦散去每撫之歎息 四友齋叢說朱野航乃
苒門一老儒也在荻扁王氏教書與主人晚酌罷主人入
內適月上野航得句云萬事不如杯在手一生幾見月當
頭喜極發狂大叫叩扉呼主人起詠此二句主人亦大擊
節取酒更酌興盡而罷 靜志居詩話祝希哲贈性甫詩
云書鈔滿篋皆親手詩草隨身半在舟

